

# Xajon ra tsikínda jè Pablo ra isìkasén-la jè Filemón

## Kó'sín síhixo'ta Pablo jè Filemón

<sup>1</sup>Tísixó'tá-la jì 'ndsé Filemón ra 'ñó tsjake-la, jì ra tijè-ni xá tji'nì koni jè xá ra tí'siaan. 'Aán-ná Pablo ra ta ngatjì 'tse Jesucristo nga ndáyá tijná'ya, 'koaá 'sín tíbindá-la jè xajon rakìi kò jè 'ndsé Timoteo. <sup>2</sup>Tìhixo'tá-ná jè tichjeé Apia kò jè xita xàngieé Arquipo ra taña inçhibixkàn-tjié kjoa kii; kò tìhixo'ta-te-ná nga'tsì jñà xita naxindá-la Cristo ra ya maxkóya ya ni'ya-li. <sup>3</sup>Nainá ra Na'ín-ná ma kò jè Jesucristo ra tijná ítjòn-ná katatsjá-no kjonda kò kjo'nchán ya ajin inìma-no.

## Kó'sín nga 'ñó makjiín-la ra a'ta 'tse Cristo jè Filemón

<sup>4</sup>'Kia nga chjà'tà-la jè Nainá, síkítsjen-yá kji'tá-la ra jì kò 'koaá 'sín xin-la nga tse kjonda kata'se-la ra jè, ra a'ta tsaji. <sup>5</sup>Nga ijyeé ki'senajmí-na kó'sín nga 'ñó kji'tatakìn a'ta 'tse Jesús ra tijná ítjòn-ná kò kó'sín nga 'ñó tsjachi jñà xita-la Nainá. <sup>6</sup>'An, 'koaá 'sín tísíjé-la Nainá nga nda katabitjasòn koni 'sín nga nda tjinìngàsòn-kji jñà xita xàngii ra i'ka jè kjoa ra kji'tatakìn mé-ni nga nda jchaxkon-isa-ni nga'tsì kjonda ra ma 'nié a'ta 'tse Cristo. <sup>7</sup>Jì 'ndsé batoó matsja-na kò batoó ma'ñótakoàan 'kia nga kó'sín tjin-li kjotsjacha, nga a'ta tsajii-ní jì ndí 'ndsé nga 'nchán tjin-ni inìma-la xita-la Nainá.

## Kó'sín jè Pablo isíjé'tjì jè Onésimo

<sup>8</sup>'Koaá ma-ni, ni'sín tji'nde-na ra a'ta 'tse Cristo nga ma ki'tín-la mé ra machjeén nga 'sjin, mì tsa kó'sín tíbi'tín-la, <sup>9</sup>nga ta jngoó kjonda tísíjé jnchro-la; nga be-náa nga matsjacha-ná xàngieé; isaá koni 'sín 'kiaa ra 'an, ijyeé xita

jchínga-na, 'an ra 'mì-na Pablo, kò tì'koaá ndayá tǐjna ra ta ngatǐ 'tse Cristo Jesús. <sup>10</sup>'Koaá ma-ni nga kò'sín tísíjé jngo-la kjonda ra a'ta 'tse Onésimo, jè ra kò'sín ma-na koni tsa i'ndí-na ma skanda 'kia nga kjokjiín-la ra a'ta 'tse Cristo; nga 'kiaá ítsi'kenajmíya-la 'kia nga kò'sín tǐjna 'an ndayá.

<sup>11</sup>Nga tì'sa kjotseé, mì kì nda kjochjeén-li jè Onésimo, tanga 'ndi 'ndi ijyeé maá kochjeén-li, kò maá kochjeén-te-na. <sup>12</sup>'Koaá 'sín tísikásén india-la, nì'sín bato 'ñó tsjake. <sup>13</sup>Ndaá-la 'se tsa i katijnako-naa tsiki, koni tsa jì kjòn-ni ra bisiko-ná i ndayá nándá nga tǐjna ra ta ngatǐ 'tse 'én nda-la Cristo.

<sup>14</sup>Tanga majìn-na jngo kjoa 'siaan, ra kjè sa jì tǐjingo takìn, nga majìn-na ta kjo'ñó katama-li jè kjonda ra tísíjé-la; jé mejèn-na tsa inìma-li katanchrabájin-ni. <sup>15</sup>Tsa kií kò'sín kjomà jnchro-ni nga jè Onésimo tsasi'taxìn chiba nìchjin-li, mé-ni nga 'ndi, 'koaá 'sín ma chjibétjò-ni nga ya kíjnakò-li skanda ta kjiá-nioo. <sup>16</sup>Tanga 'ndi-ni, kì chjàn ta kò'sín chjibétjì koni tsa jngo chì'nda ra ta síxá kjotjò-li; nga 'ndi-ni, isaá chjì-la, nda mí 'koa-ni koni tsa jngo chì'nda. Ndaá chjibétjì 'ndi-ni koni jngo 'ndsì ra bato 'ñó tsjachi. Ra 'an, batoó 'ñó tsjake; kò jì tǐjnéa-la isa 'ñó kotsjachi, isaá 'ndi, mì tsa ta chì'nda-li ma, ijyeé 'ndsè chiba jìòn ra a'ta 'tse Na'ín-ná.

<sup>17</sup>Tsa kixì kitií kjoa, nga 'ndsì 'mí-ná ra a'ta 'tse Cristo, 'koaá 'sín chjibétjì koni tsa 'an kjòn-na ra tjichjibétjò-ná. <sup>18</sup>Tsa mé ra isìkò-li kò tsa kó'ki tjen'tin-li, 'an tìkíchjì-ná. <sup>19</sup>'An Pablo, 'an sabá tǐbindá xajon rakì, 'aán kíchjì tsje-la; nì'sín ijye tǐjjin-te-li nga 'aán tjen'tin-ná kjobinachon ra tǐjn-li 'ndi-ni. <sup>20</sup>Jì ndí 'ndsé, 'koaá 'sín tǐjn kjonda ra tísíjé-la, mején-na nga katasakó jngo-na kjonda ra a'ta tsaji koni 'sín nga bakèn-la ra 'ndsé chibé a'ta 'tse Na'ín-ná; kò'sín tìjetakìn inìma-na ra a'ta 'tse Cristo.

<sup>21</sup>Be-náa nga 'koaá 'sín sǐhitjasìn; 'koaá ma-ni nga kò'sín tǐbindá-la xajon rakì; kò skanda maá-li nga isa kǐjn kjoa 'sian isi koni 'sín tǐjn ra tísíjé-la. <sup>22</sup>Tì'koaá tjen tinda itsé-ná i'nde ya ni'ya-li, nga 'koaá 'sín tíkoáa koni 'sín nga inchinjé'ta-la jìòn Nainá, kǐjchó nìchjin nga kǐjcho katsǐjen-no.

### 'Én-la Pablo ra fehe'ta-ni

<sup>23</sup>Tísíhixò'tà-li jè Epafras, xita xàngieé ra taña titsajna-jìn ndayá ra ta ngatǐ 'tse Jesucristo. <sup>24</sup>Tì'koaá tísíhixò'tà-li

jè Marcos, Aristarco, Demas kò jè Lucas, xit̃a ra ì  
 ìnchibasikò'ta-na.

<sup>25</sup>Jè katatsjá-no kjònda-là Jesucristo jè ra tíjna ítjòn-ná nga  
 katjaha'sen-jin yà inìma-no. Kò'sín katama.